

Ilanz/Glion, 27 d'avrel 2026

Communicaziun allas medias petiziun «Pusseivladad da pagar cun daners bluts sin tut ils parcadis publics dalla vischnaunca Ilanz/Glion»

Ils 6 da fevrer 2026 ei vegnida surdada alla vischnaunca Ilanz/Glion la petiziun «Pusseivladad da pagar cun daners bluts sin tut ils parcadis publics dalla vischnaunca Ilanz/Glion». La suprastonza communal Ilanz/Glion ha priu enconuschientscha dalla petiziun.

Ella petiziun pretendan 760 personas cun domicil enteifer la vischnaunca Ilanz/Glion, che tut ils parcadis publics dalla vischnaunca sappien vegnir pagai naven dad immediat era cun daners bluts. Els argumenteschan che l'aboliziun dil diever da daners bluts munti in disavantatg per personas, ch'ei buca versadas da pagar cun agid da mieds digitalis.

Motivs per la digitalisaziun

Ils davos onns han ins saviu observar en Svizra in svilup vi tier il diever da systems digitalis per administrar parcadis. Per quei svilup dat ei differents motivs. Adina dapli personas nezegian mieds da pagament digitalis. Personas che nezegian parcadis spetgan sligiaziuns digitalas che simplificheschan ils process da pagar, era senza daners bluts. Sche la vischnaunca tegn sidretg parallelmein tier la purschida digitala era aunc in sistem analog cun uras da parcar, che vegnan duvradas adina pli e pli pauc, caschuna quei aults cuosts d'investiziuns e da manteniment, senza che quei sistem genereschi ina plivaleta corrispudenta pil menaschi. Nuotatonmeins vegnan las uras da parcar a restar vinavon sils areals da parcar impurtonts. Quei per garantir che varga 50 pertschien dils areals sin territori dil marcau da Glion seigien aschia curclai. Ina garanzia per 80 pertschien fuss pusseivla cun duas ulteriuras uras da parcar, denton vegn quella quota taxada per pauc utila damai ch'ils parcadis ein decentralis e vegnan frequentai mo pauc.

Engaschament per ina sligiaziun pragmatica

La suprastonza communal Ilanz/Glion constatescha, che la pusseivladad da parcar sin parcadis publics ei era dada per personas che prefereschan da pagar cun daners bluts, malgrad la demontascha da singulas uras da parcar. La demontascha ei succedida perquei che las uras da parcar vevan in'aula quota da problems technics. Plinavon eran quellas arrivadas dalla tecnica enneu alla fin da lur veta. In remplazzament ei buca vegnius fatgs en vesta alla realisaziun dil niev uorden da parcar ch'ei preveda. En las fracziuns (auter che Glion) ein las empremas otg uras gratuitas, naven da lu vegn quintau el futur cun 1.00 franc per ura. Tschaffar il temps da parcar gratuit ei pusseivel cun in'applicaziun, senza stuer registrar in mied da pagar. L'obligaziun da pagar vala naven da gliendisgis entochen dumengia denter las 07.00 e las 19.00. Ordeifer quellas uras eis ei pusseivel da parcar senza stuer tschaffar enzatgei sur in'applicaziun. Aschia vala de facto in'obligaziun da pagar mo per quater uras e quei cun saver nezegiar il parcadi in entir gi. Cartas da parcar san vegnir retratgas encunter pagament cun daners bluts tier la controlla da habitonts.

Sin territori dil marcau da Glion vegnan las empremas 30 minutas ad esser el futur gratuitas (vala per tut ils parcadis sil territori dil marcau da Glion). Parcadis per cuorta durada sper la halla da gimnastica a Glion restan vinavon gratuits ordeifer il temps da scola (utilisaders dalla halla e dall'aula). Vitier duein visitaders dil bogn aviert Ilanz/Glion el futur saver parcar gratuitamein suenter ch'els han pagau l'entrada singula ni in abonament pil bogn (registraziun suenter l'entrada). Quellas midadas entran en vigur el decuors dil 2026. Medemamein vegnan las uras da parcar existentas modernisadas e tenor basegns cumpletadas suenter ch'il niev uorden da parcar entra en vigur. Quellas mesiras ein previstas entochen la fin dil 2026.

Las mesiras planisadas muntan era in levgiament per las utilisadras ed ils utilisaders che fan diever dils parcadis publics dalla vischnaunca Ilanz/Glion. Ina realisaziun dallas pretensiuns dalla petiziun «Pusseivladad da pagar cun daners bluts sin tut ils parcadis publics dalla vischnaunca Ilanz/Glion» vess per consequenza, che las taxas da parcar stuessen vegnir alzadas. Aschia stuessen ils parcadis vegnir pagai durant 24 uras sur siat gis ad jamna.

Dretg da petiziun

La petiziun «Pusseivladad da pagar cun daners bluts sin tut ils parcadis publics dalla vischnaunca Ilanz/Glion» ei vegnida sutscrita da varga 1'700 personas. L'examinaziun dallas sutscriziuns ha mussau che 760 personas ein domiciliadas ella vischnaunca Ilanz/Glion. 120 sutscriziuns ein buca valeivlas, q.v.d. da personas ch'ei mortas, personas buc identificablas ni sutscriziuns dublas. 66 personas han ina abitaziun secundara ella vischnaunca Ilanz/Glion. 773 personas habiteschan el cantun Grischun, ulteriuras en auters cantuns ni egl exterior.

Il dretg da petiziun ei garantius sin fundament dalla constituziun dalla vischnaunca Ilanz/Glion. Scadina persona che habitescha en vischnaunca sa inoltrar a scret allas autoritads communalas propostas, giavischs e reclamaziuns. Quellas ein obligadas da prender posiziun enteifer treis meins. Per ch'era personas che han negin domicil ella vischnaunca Ilanz/Glion seigien informadas, respectivamein sappien vegnir contonschidas, succeda la posiziun tier la petiziun en fuorma d'ina comunicaziun allas medias.

Ulteriurs sclariments:

– Suprastonza communal Ilanz/Glion, info@ilanz-glion.ch, 081 920 15 15